



法書要錄卷第十

右軍書記



十七帖長一丈二尺卽貞觀中內本也一百七  
行九百四十二字是烜赫著名帖也太宗皇帝  
購求二王書大王艸有三千紙率以一丈二尺  
爲卷取其書迹及言語以數相從綴成卷以貞  
觀兩字爲二小印印之褚河南監裝背率多紫  
檀軸首白檀身紫羅標織成帶開元皇帝又以

法書要錄

卷之十

汲古閣

開元二字爲二小印印之跋尾又列當時大臣  
等十七帖者以卷首有十七日字故號之二王  
書後人亦有取帖內一句語稍異者標爲帖名  
大約多取卷首三兩字及帖首三兩字也

十七日先書郗司馬未去卽日得足下書爲慰先  
書以具示復數字

吾前東粗足作佳觀吾爲逸民之懷久矣足下何  
以方復及此似夢中語耶無緣言面爲歎書何能



悉

瞻近無緣省告但有悲歎足下小大悉平安也云  
卿當來居此喜遲不可言想必果言告有期耳亦  
度卿當不居京此既僻又節氣佳是以欣卿來也  
此信旨還具示問

龍保等平安也謝之甚遲見卿舅可早至爲簡隔  
也

知足下行至吳念違離不可居叔當西耶遲知問

法書要錄

卷之十

汲古閣

計與足下別廿六年於今雖時書問不解濶懷省  
足下先後二書但增歎慨頃積雪凝寒五十年中  
所無想頃如常冀來夏秋間或復得足下問耳比  
者悠悠如何可言吾服食久猶爲劣劣大都比之  
年時爲復可耳足下保愛爲上臨書但有惆悵

省足下別疏具彼土山川諸奇楊雄蜀都左太冲  
三都殊爲不備悉彼故爲多奇益令其游目意足  
也可得果當告卿求迎少人足耳至時示意遲此

期真以日爲歲想足下鎮彼土未有動理耳要欲  
及卿在彼登汶嶺峩岵而旋實不朽之盛事但言  
此心以馳於彼矣

諸從竝數有問粗平安唯修載在遠音問不數懸  
情司州疾篤不果西公私可恨足下所云皆盡事  
勢吾無間然諸問想足下別具不復一一

得足下旃罽胡桃藥二種知足下至戎鹽乃要也  
是服食所須知足下謂須服食方回近之未許吾

法書要錄

卷之十  
三

汲古閣

此志知我者希此有成言無緣見卿以當一笑  
云譙周有孫高尚不出今爲所在其人有以副此  
志不令人依依足下具示嚴君平司馬相如揚子  
雲皆有後否

天鼠膏治耳聾有驗否有驗者乃是要藥

朱處仁今何在往得其書信遂不取荅今因足下  
荅其書可令必達

省別具足下小大問爲慰多分張念足下懸情武



昌諸子亦多遠宦足下兼懷竝數問不老婦頃疾篤救命恒憂慮餘粗平安知足下情至

旦夕都邑動靜清和想足下使還一一時州將桓公告慰情企足下數使命也謝無奕外任數書問無他仁祖日往言尋悲酸如何可言

知有漢時講堂在是漢和帝時立此知畫三皇五帝以來備有畫又精妙甚可觀也彼有能畫者不欲摹取當可不須具告

法書要錄

卷之十  
四

汲古閣

往在都見諸葛顛曾具問蜀中事云成都城池門屋樓觀皆是秦時司馬錯所修令人遠想慨然爲爾不信一一示爲欲廣異聞

青李來禽櫻桃日給藤

已上  
四行

子皆囊盛爲佳函封

多不生足下所疏云此果佳可爲致子當種之此種彼胡桃皆生也吾篤喜種果今在田里惟以此爲事故遠及足下致此子者大惠也

彼所須此藥草可示當致

虞安吉者昔與共事常念之今爲殿中將軍前過  
云與足下中表不以年老甚欲與足下爲下寮意  
其資可得小郡足下可思致之耶所念故遠及

吾有七兒一女皆同生婚娶以畢惟一小者尚未  
婚耳過此一婚便得至彼今內外孫有十六人足  
慰目前足下情致委曲故具示

已上十  
七帖也

玄度先乃可耳嘗謂有理因祠祀絕多感其夜便  
至此致之生而速之每尋痛惋不能已已省君書  
法書要錄

卷之十  
五

汲古閣

增酸恐大分自不可移時至不可以智力救如此  
先生適書亦小小不能佳大都可耳此書因謝常  
侍信還令知問可令謝長史且消息  
數親問叔穆嘉寶竝有問爲慰

知道長不孤得散力疾重而邇進還甚令人憂念  
遲信還知問

婦安和婦故羸疾憂之焦心餘亦諸患

君昨示欲見穆生敘讚今欲默語興廢之格粗當



書爾不玄度好佳君謂何似

從事經過崔阮諸人昨旦與書疾故示毒愁當增其疾吾如今尚劣劣又晚熱未有定發日有定示足下興耳近書或欲畱吾甚欲與俱而吾疾患遲速無常其竟云何足下今知問

適太常司州領軍諸人二十五六書皆佳司州以爲平復此慶之可言餘親親皆佳大奴以還吳也冀或見之

法書要錄

卷之十  
六

汲古閣

司州供給寥落去無期也不果者公私之望無理或復是福得大等書慰心今因書也野數言疏平安定太宰中郎

適州將十五日告徐一癰方尺許口四寸云數如來小如差然疾源如此憂怛尚深故遣信治徐舍人書以示徐還示足下也不堪縲疑事列上台周青州視事今以當至下耶甚是事宜無方身世而任事者疾患如此使人短氣

六月十九日羲之白使還得八日書知不佳何爾  
耿耿僕日弊而得此熱忽忽解日爾力遣不具王

羲之白

白字只  
點成

一見尚書書一二日遣信以具必宜有行者情事  
恐不可委行使耶遲還具問亦以與尚書諮懷今  
復遣諮吳興也

遠近清和士人平安荀侯定住下邳復遣軍下城  
此間民事愚智長歎乃亦無所隱如之何又須求

法書要錄

卷之十  
七

汲古閣

雨以復爲灾卿彼何似

江生佳須大活以始見之與人上蕭索可歎

汝宜速下不可稽畱計日遲望今日亦語劉長史  
令速

近因得里人書想至知故面腫今差不吾比日食

意如差而骭

玉篇下諫  
反堅也

中故不差以此爲至患至

不可勞力數字令弟知聞耳

姊適復二告安和郝故病篤無復他治爲消息耳



憂之深今移至田舍就道家也事畢當吾遣信視  
淑還母子平安爲慰至恨不得暫見故未得下船  
道夷書云已得一宅想今安穩耳不政解此移趨  
知部兒不快何所在今已佳也耿耿信白  
與殷侯彼此格卿取

卒喜慰氣滿無他治噉數合米來三日

知足下哀感不佳耿耿吾下勢腹痛小差須用女  
萋丸得應甚速也

法書要錄

卷之十  
八

汲古閣

在我而已誠無所多云與謝豫州共入河不乃煩  
劇得安萬送書云六日可至諸賢云朝廷失之轉  
覺闕然與卿書同此四字注不有君子其能國乎此言  
深也但云卿當入何以如夢恐卿表將復經年想  
仁祖差時還內鎮慰人情耳皆在卿懷矣

產婦兒萬畱之月盡遣甚慰心

得袁二謝書具爲慰袁生暫至都已還未此生至  
到之懷吾所盡也弟預須遇之大事得其書無已

已二謝云殊未必來計日遲望萬羸不知必俱不  
知第往別停幾日決其笑爲樂也尋分旦與江姚  
女和別殊當不可言也

知庾丹陽差數深深致心致心

得孔彭祖十七日具問爲慰云襄經還蠡是反善  
之誠也於殷必得速還無復道路之憂比者尚懸  
悒得其去月書省之悲慨也

上流近問不竟何日卽路知謝定出居內所弘故

法書要錄

卷之十  
九

汲古閣

重是不情廢情存大

明或就卿圍碁邑散今雨寒未可以治謝

江表付還

此四字  
一行

得書知足下問吾骯髒

上下黨反下  
口亞反腰骨

拘闕痛俛仰

欲不得此何理耶願輒與相見無盡治宜足下得  
益使之不疑也但月又未陰沈沈恐不可針不知  
何以教目前甚憂頓王羲之

比信尋知足下有書可道知足下未能得景聖近



爲然知得家問賢子動疾念甚憂慮懸得後問不  
分張何可久幼小故疾患無賴

野大皆當以至不得還問懸心大得善悉也野當  
不能遏卿竝轉茂清談

足下小大佳也諸疾苦憂勞非一如何復得都下  
近問不吾得敬和二十三日書無他重熙住定爲  
善

謝二侯

此三字  
又一行

法書要錄

卷之十  
十

汲古閣

山 夕日不得復意問一昨晚還未得遣書得告  
知中冷不解更壯溼甚耿耿服何藥耶僕此日差  
勝尋知問王羲之頓首

羲之頓首向又慘慘自舉哀乏氣勿勿知便當西  
且不相知來想熊能更言問力遣不次王羲之頓

首

此二帖  
帶行

七日告期痛念玄度未能

闕

心汝臨哭悲慟何可

言言及惋塞夜

闕

市器俱不合用令摧之也吾平

平但昨來念玄度體中便不堪之耶告

汝當須過殯還恒有悲惻

王延期省

此四字  
一行

妹轉佳慶不及啼不憶念奴殊不可言涼當迎之  
昨卽得丹陽水上書與足下書同故不送昨諸書  
付還

去冬遣使想久至乖離忽四年言之歎慨豈言所  
喻悠悠數十卒當何期汝等將慎爲上知復何云

法書要錄

卷之十  
十一

汲古閣

念足下寤思兼至不可居處雨氣無已卿復何似  
耿耿善將息吾故劣力知問王羲之

吾何當還

此四字  
一行

汝尚小愁思兼至不可居處多疾足下前許歲未  
今暫還想必可爾故復白

十一月十三日告期等得所高餘姚并吳興二十  
八日二疏知並平安慰吾平平比服寒食酒如似  
爲佳力因王會稽不一一阿耶告知



想大小皆佳丹陽頃極佳也云自有書不附此信耳大小問多患懸心想二奴母子佳遲卿問也

吾去日盡欲畱女過吾去自當送之想可垂許一出未知還期是以白意夫人涉道康和足下小大皆佳度十五日心齊江故二日知問須信還知定當近道迎足下也可令時還遲面以日爲歲

去冬臨臨安事近便欲決去而何候不許事聞以有小寇今未便得果然故有移南意尚未可倉卒法書要錄

卷之十  
十二

汲古閣

復信更具信汝也

六日昨書信未得去時尋復逼或謂不可以不恭命遂不獲已處世之道盡矣何所復言

丹陽旦送吾體氣極佳其在卿故處增思詠

若可得耳要當須吾自南但增感塞

十四日諸問如昨云西有伐蜀意復是大事速送袍來

遂當發詔催吾帝王之命是何等事而辱在草澤

憂歎之懷當復何言見足下一

昨送諸書令示卿想見之恐殷侯必行義聖雖宜爾然今此集信爲未易卿若便西者良不可言

安復後問不想必停君諸舍疾若差也便疾綿篤了不欲食轉側須人憂懷深小妹亦故進退不孤得散力煩不得眠食至少疾患經日兼憔悴不可言迎集中表親疏畧盡實聖投老得盡田里骨肉之歡此一條不謝二疏而人理難知此不知小却

法書要錄

卷之十  
十三

汲古閣

得遂本心不交衰朽羸劣所憂營如此君視是頤養之功當有何理今都絕思此事也冀疾患差末殊初冬必思與諸君一佳集遣無益快矣爲樂欲省補頃者之慘蹙也追尋前者意事豈可復得且當率目前及當此急要願諸君各保愛以俟此期未近見君有諸結力聊以當面 各間意必欲省安西如今意無前却也想君必俱賊勢可之者必進許洛無可不果相遇于一世豈可度之尋常以



此至終故當極盡志氣之所託也君此意弘足然

決在必行

當面止似  
爲一帖

未復知問晴快卿轉勝向平復也猶耿耿想上下  
無恙力知問不具王羲之敬問

日月如馳一嬖弃背再周去月穆松大祥奉瞻廓  
然永惟悲摧情如切割汝亦增慕省疏酸感

延期官奴小女病疾不救痛愍貫心吾以西夕情  
愿所鍾唯在此等豈圖十日之中二孫天命惋傷

法書要錄

卷之十  
十四

汲古閣

之甚未能喻心可復如何

此有兩帖  
語小異

敬親今在剡其後復亡甚不可言

穰鐵不知已得

一行  
短書

行近遣書想卽至此雨汝佳不得懸心吾乏劣力  
數字

七月十三日告鄱陽兄弟大降制終去悔悼甚乳  
絕悲傷痛懷切割心情也

諸葛公者君識之不才幹好佳往爲錢塘著績又

入僕府有以盡悉宰民之至也甚欲自託於明德云臨安春當闕爾者君能請不僕必欲言得佳長史亦當是君所須既得里人共事異常故乃爾須還告之

人理不可得都絕每至屬致使人多歎

十五日義之報近甚倉卒得十三日音知卿佳慰之力及陽主書不一二義之報

會稽亦復與選論卿否吾誠勅勅於論事然于弟

法書要錄

卷之十  
十五

汲古閣

尚不惜小宜謂選官前意已佳可不復煩重卿更息必謂宜論者必有違矣

上下安也和緒過見之欣然敬豫乃成委頓令人深憂江生亦連病今已差

知阮生轉佳甚慰甚慰會稽近患下始差諸謝粗佳

足下差否甚耿耿喉中不復燥耳故知問具示王義之白



冷過足下夜得眠不祇差也復何治甚耿耿長史  
復何似故問具示王羲之白

遂無雨候使人歎得諸孫書高田皆欲了

得書知足下患癩念卿無賴思見足下冀脫果力  
不一一王羲之白

此賢懷所禮也面一一

五月十四日羲之近反至也得七日書知足下故

爾耿耿善將息吾腫得此霖雨轉劇憂淡力不一

法書要錄

卷之十  
十六

汲古閣

一羲之

適萬石去月五日書爲慰尋得彭祖送萬九日露

版再破賊有所獲想足摧寇越逸之勢宜適許司

農書爲慰無人未能得重故向餘杭間

此注三  
行短

因緣示致問非書能悉想君行有旨信

伯熊上下安和爲慰可令知問叔夷子前恨不見

可令熊知消息

羊參軍還朝論長見敦恕其爲慶慰無物以喻今

又告誠先靈以文示足下感懷慟心

又以表書示卿政當亦不

痛念玄度立如志而更速禍可惋可痛者省君書亦增酸

服食故不可乃將冷藥僕卽復是中者腸胃中一冷不可如何是以要春秋輒大起多腹中不調適君宜淡以爲意省君書亦比得之物養之妙豈復容言直無其人耳許君見驗何煩多云矣

法書要錄

卷之十  
十七

汲古閣

袁彭祖何日過江想安穩耳失此諸賢至不可言足下分離如何可言

此段不見足下乃甚久遲面明行集冀得見卿得申近不問

此五字  
一行

謝侯

此二字  
一行

四月五日羲之報建安靈柩至慈陰幽絕垂卅年  
永惟崩慕痛徹五內永酷奈何無由言告臨紙摧

哽羲之報

此一帖  
真艸書



十一月十八日義之頓首頓首從弟子天沒孫女  
不育哀痛兼傷不自勝奈何奈何王義之頓首

此一

帖行  
書

二蔡過葬來居此親親集事而君復出爲因耳

此一

帖草  
書

九月十八日義之頓首茂善晚生兒不育痛之惻  
心奈何奈何轉寒足下不可不可不得問多日懸  
情吾故劣力不具王義之頓首

此一帖  
行艸

法書要錄

卷之十  
十八

汲古閣

十月十一日義之敬問得旦書知佳爲慰吾爲轉  
差力不一一義之敬問

行草

二十七日告姜汝母子佳不力不一一耶告

此一  
帖行

艸

義之頓首二孫女天殤悼痛切心豈意一旬之中  
二孫至此傷惋之甚不能已已可復如何義之頓

首  
真行

廿八日義之白得昨告承飲動懸情想小爾耳還

旨不具王羲之再拜

艸書

庾新婦入門未幾豈圖奄至此禍情愿不遂緬然  
永絕痛之深至情不能已况汝豈可勝任奈何奈  
何無由叙哀悲酸

此帖  
行書

君服前賢弟逝沒一旦奄至痛當奈何當復奈何

臨紙咽塞王羲之頓首頓首

此一帖  
真行

雪候旣不已寒甚盛冬平可苦患足下亦當不堪

之轉復知問王羲之

此一帖  
行書

法書要錄

卷之十  
十九

汲古閣

書末云得諸爲慰知汝姨欲西情事難處然今時  
諸不易得東安書甚不欲令汝姨出懇至想自思

之行書

上下可耳產行往當迎慶思之不可言

此一帖  
行書

今付吳興酢二器

真行

一日不暫展至恨叱而不已便懷不果東至可恨  
思叙想閒暇必顧也

適都使還諸書具一一須面具懷



得征西近書委悉爲慰不得安西許有問不知何  
久長風書平安今知殷侯不久畱之甚善甚善  
舍內佳不中書何似家中疾篤恆救旦夕比知覺  
有省書想至

義興何似懸情慕容遂來據鄴可深憂官復遣軍  
可以示義興中書

昨得殷侯荅書今寫示君承無怒意旣而意謂速  
息順從或有怨理大小宜盤桓或至嫌也想復深

法書要錄

卷之十  
二十一

汲古閣

息

復征許也

此四字  
一行

八月二十四日義之頓首

闕

竟增哀感奈何奈何

兩足下可耳不得問

闕

日懸心吾故劣劣王義之

頓首

此雨足何耳故當收佳云彼甚快大事吳義興吳

闕  
是蕩然可歎

知諸患耿耿今差也華母子佳

時行皆遍事輕耳彼云何

道祖瘖下乃危篤憂怛憂怛

賊勢可見此云方軌萬萬如志但守之尚足令智者勞心此回書恒懷湯火處世不易豈惟公道

此兩

字行也  
下側書

諸人十二日書云慕容乃抄梁下得數

闕

目下疾

疫非常乃以至京極有傷此憂之下者想君勤勤之

法書要錄

卷之十  
二十一

汲古閣

復委篤恐無興理諸人書亦云爾也憂之怛怛得停乃公私大計也

君頃以何永日憶去冬不可得知如何如何

桓公以江州還臺選每事勝也不可當在誰耳

源書以發吾欲路次見之亦不欲停甚

闕

官舍佳也得諸舍問不知遮何日西言及辛酸卿不可懷期等故勿憂勿憂淡

近書及至也瞻望不遠而未期斃面如之何遲得



問也

謝侯數不在歎

此一行至底皆缺

前知足下欲居此常喜遲知定不果悵恨未知見卿期當數音問也

得都近問清和爲慰云劉生近欲舉君爲山陰以中當爲最君期於未獲供養處相爲慨然仕宦殆是想也

君學書有意今相與艸書一卷

法書要錄

卷之十二

汲古閣

小大佳不可得司馬問懸情適安以中軍出鎮有避賢意乃云行得言面不知公私此理卒當之耶甚憂真本無集之者想今與君書一

見此當何言但恐今婦必門首有出

四字注

復有將

來之弊耳此願盡珍御理

想彼人士平安二郗數

闕也

敬豫諸人近來停數

日悉佳安石已南遷其諸兄弟此改殊命蕭索聞君以復入相府何時當應命未得坐處亦當愁罔

思得爲鄰豈常情恐君方處務此命難期如之何  
不一一小佳復意問也

源遂差不云尚未恭命終之何聞真長知吳興想  
必如意南道差不

君大小佳不松廬善斲也僕信還秦州將去月十  
二日告甚慰如曹失護語此君甚康壯常是肥渴  
耳實尋還遲之不可言二妹差佳慰問心期中冷  
頃時行可畏愁人

法書要錄

卷之十  
二十三

汲古閣

不得司馬近問懸情近所送書卽至也君信明早  
令得後得鄙書未至卽想東不久耳

此鄙問無恙諸從皆佳比諸數耳知劉阮數

闕

溫公在此前東北面還此復初

闕

散爲慰便乞良

不可言卿得知之復其一快樂

武妹小大佳也

闕一字

知郡荒吾前東周旋五千里所在皆爾可歎江東  
自有大頓勢不知何方以救其弊民事自欲歎復



爲意卿示聊及

調一

數得桓公問疾轉佳也每懸胡云征事未有日佳也以逼勢不知卒云何爾

君大小佳不至此乃知熙往覺少不得同萬恨萬恨云出便當西念遠別何可言遲見玄度今或以道

賓如人往不堪致心意之不忘懷之

妹不快憂勞餘平安

法書要錄

卷之十  
二十四

汲古閣

未得安西問玄度忽腫至可憂慮得其昨書云小差然疾候自恐難耶

與安石俱佳還七日增想投命積日不復知問弟佳寧善然復憂之不去懷吾遂沈滯兼下如近數日分無復理昨來增服陟釐丸得下不知遂斷不了無所噉而藥得停不知當復見弟

二字

理不獨

下便長歎小蘇息更知問二奴庶諸人何以謝之

已上九字  
注兩行

想清和士人皆佳彭祖諸人得足下慰旦夕也此諸賢平安每面粗有嘆慨追恨近日不得本善散無已已度足下還期不久耳此者數令知問

懷足下可謂禮之

闕

今以志心寄卿想必至到論

之救命不暇此事於今爲奢遠耳要是事其本心所欲論事今付

今與馮公論何產足下可息助明清談至是舉今又語真道今宣旨矣

法書要錄

卷之十  
二十五

汲古閣

臣義之言寒嚴不審聖體御膳何如謹付承動靜

臣義之言

召表皇  
太后一

臣義之言伏惟陛下天縱聖哲德齊二儀

自哲以  
下則注

應期承運踐登大祚普天率土莫不同慶臣抱疾遐外不獲隨例瞻望宸極屏營一隅臣義之言

劉氏平安也梅妹可得袁妹腰痛冀當小爾耳汝母故若以不安食疾久憂憤當思平理也神意不同前者也



今付北方脯二夾吳興鮓二器蒜條四千二百

司馬雖篤疾久頃轉平除無他感動奄忽長逝痛  
毒之甚驚惋摧慟痛切五內當奈何奈何省書感  
哽

雨寒卿各佳

一字注

不諸患無賴力書不一一義之

問

想官舍無恙吾必果二十日後乃往遲喜散恙比  
爾自相聞也

法書要錄

卷之十  
二十六

汲古閣

九月三日羲之報敬倫遮諸人去晦祥禪情以酸  
割念卿傷切諸人豈可堪處奈何奈何及書不旣  
羲之批

九月二十五日羲之頓首便陟冬日時速感歎兼  
哀傷切不能自勝奈何得七月末時書爲慰始欲  
寒足下常疾比何似每耿耿吾故不平復憂悴力  
困不一一王羲之頓首

且極寒得示承夫人復小欵不善得眠助反側想

小爾復進何藥念足下猶悚息卿可否吾昨冀復  
大吐小噉物便爾且來可耳知足下念王羲之頓  
首

延期官奴小女竝得暴疾遂至不救愍痛心奈何  
吾以西夕至情所寄唯在此等以禁慰餘年何意  
旬日之中二孫天命日夕左右事在心目痛之纏  
心無復一至於此可復如何臨紙咽塞

六月二十七日羲之報周嫂弃背再周忌日大服

法書要錄

卷之十  
二十七

汲古閣

終此晦感摧傷悼兼情切劇不能自勝奈何奈何  
穆松壘祥除不可居處言以酸切及領軍信書不  
次羲之報

頓首頓首亡嫂居長情所鍾奉始獲奉集冀遂至  
誠展其情愿何圖至此未盈數旬奄見背弃情至  
乖喪莫此之甚追尋酷恨悲惋深至痛切心肝當  
奈何奈何兄子荼毒備嬰不可忍見發言痛心奈  
何奈何王羲之頓首頓首



君頃復以何散懷鐵云秋當解褐行復分張想君  
比爾快爲樂彥仁書云仁祖家欲至蕪湖單弱伶  
俚何所成君書得載停郡迎喪甚事宜但異域之  
乖素已不可言何時可得發

六日告姜復內始晴快情汝

一字注

母子平安

二十七日告姜汝母子佳不力不一一耶告

前使還有書哀猥不能敘懷情痛兼哀若割當奈  
何奈何省弟累紙哀毒之極但報書難爲心懷况  
法書要錄

卷之十  
二十八

汲古閣

卿處之何可具忍有始有卒自古而然雖當時不  
能無情痛理有大斷豈可以之致弊何由寫心絕  
筆猥咽不知何言也

十二月六日義之報一昨因暨主簿不悉昨得去  
月十五日二十三日二書爲慰兩書夜無解夜來  
復雪弟各可也此日中冷患之始小佳力及不一  
一義之報

義之歿罪前得雲子諸人書竝毀頓胡之惟分推

難爲心當有分西者否義之死罪

七月五日義之頓首昨便斷艸葬送期近痛傷情  
深奈何奈何得去月二十八日告具問慰懷力還  
不次王義之頓首

七月十六日義之報凶禍累仍周嫂弃背大賢不  
救哀痛兼傷切割心情奈何奈何遣書感塞義之  
報

二十三日發至長安云渭南患無他然云符健衆  
法書要錄

卷之十  
二十九

汲古閣

尚七萬苟及最近雖衆由匹夫耳卽今尅此一段  
不知歲終云何守之想勝才弘之自當有方耳

隔以久諸懷旣不可言且今多慘戚遲君果前甞  
得一散懷知以多疾不果乃當秋事省告同此歎  
恨如何可言葬事不可倉卒當在九月初過此故  
欲一與吳興集冀無不尅耳然事來萬端不知如  
人意不非書能悉君數告以慰之耳

六月十六日義之頓首秋節垂至痛悼傷惻兼情



切割奈何奈何此雨過得十日告知君如常吳興  
轉勝甚慰想得此涼日佳患散乃委煩耿耿且以  
佳興消息僕故是常耳劣劣解日力不次王羲之  
頓首

歌章輒付卿或有寫書人者可寫一道與吾也  
羲之死罪去冬在東鄮因還使白牋伏想至自頃  
公私無信便故不復承動靜至於詠德之淡無日  
有隧省告可謂眷顧之至尋翫三四但有悲慨民  
法書要錄

卷之十  
三十

汲古閣

年以西夕而衰疾日甚自恐無蹙展語平生理也  
以此忘情將無其人何以復言惟願珍重爲國爲  
家時垂告慰絕筆情塞羲之死罪

六月十一日羲之報道護不救疾惻怛傷懷念弟  
聞問悲傷不可勝奈何奈何曹妹累喪兒女不可  
爲心如何得二十三日書爲慰及還不次王羲之  
報

追尋傷悼但有痛心當奈何奈何得吾慰之吾昨

頻哀感便欲不自勝舉旦服散行之益頓乏推理  
皆如足下所誨然吾老矣餘願未盡唯在子輩耳  
一旦哭之坐盡之年轉無復理此當何益冀小却  
漸消散耳省卿書但有酸塞足下念故言散所豁  
多也王羲之頓首

向遣書想夜至得書知足下問當遠行諸懷何可  
言一十必早發想足下如向期也阮矣止於界上  
耳向書已具不復一一王羲之白

法書要錄

卷之十  
三十一

汲古閣

宿息想足下安書吾猶不勝能佳一十早往遲王  
羲之頓首

二十九日羲之報月終哀摧傷切奈何奈何得昨  
示知弟下不斷昨紫石散未佳卿先羸甚羸甚好  
消息吾比日極不快不得眠食殊頓勿令合陽冀  
當佳力不一一王羲之報

九月二十八日羲之頓首頓首昨者書想至叅軍  
近有慰阮光祿信在耳許中郎家欲因書比去報



知庾君遂不救疾摧切心情不得自

塗兩三字

甚痛當

奈何淡當寬勉以不忘先心臨紙但有酸惻王義之頓首

義之白不復面有勞得示足下佳爲慰吾却遽又睡甚勿勿力不具王義之白

十一月五日義之報適爲不吾悉不適弟各佳不吾至勿勿力數闕義之報

兄弟上下遠至此慰不可言嫂不和憂懷淡期等法書要錄

卷之十三十二

汲古閣

殊勿勿焦心

桓公不得敘情不可居處雲子諸人何似耿耿能數省否

彥仁數問也修載斃來忻慰

六月十九日義之白使還得八日書知不佳爾何耿耿僕日弊而得此熱勿勿解白耳力遣不具王義之白

十二月一日義之白昨得還書知極不加疾人甚

憂耿耿消息比佳耳吾至乏劣爲爾日日力不一義之報

想明日可謝諸子

十四日義之白近反不悉闕兩足下佳不得近

問問無殊不佳頓劣因不一一義之白

義之頓首何貺知意至諸君皆困乏常想無之何緣作此煩損今付還王義之

長高當暫還耶

法書要錄

卷之十  
三十三

汲古閣

范公書如此今示君須庾見故當勸果之告旨語君遲而不可言

一日多恨知足下散動耿耿護護吾至不佳劣劣不一一王義之頓首

司馬疾篤不果西憂之淡公私無所成

知比得丹陽書甚慰乖離之歎當復可言尋荅其書足下反事復行便爲索然良不可言此亦分耳遲面一一



比日尋省卿文集雖不能悉周徧尋翫以爲佳者  
名固不虛序述高士所傳小有異同見卿一一問  
應止楊王孫前以共及意同可誠述敘之耶暇日  
無爲想不忘之

初月一日羲之白忽然改年新故之際致歎至深  
君亦同懷近過得告故云腹痛懸情災雨比復何  
似氣力能勝不僕爲耳力不一一王羲之

旦書至也得示爲慰云小大多患念勞心遲見足  
法書要錄

卷之十  
三十四

汲古閣

下未果爲

兩字注

結力不一一王羲之白

三日先疏未得去得四日疏爲慰兄書已具不復

一一

鎮軍昨至尚未見也尋見之悲欣不可言

上下近問慰馳情不知何似絕不得松問汝得旨  
問馳白宜豫知分春事也吾日東可語期令知消  
息

復數橘子卽云乃好可噉久得新栗此院冬桃不

能得多送觸事何當不存往恒語然獨折

知書有去縣犇去誠意義官至也有禮制恐不必  
果耶且君在彼縣常以爲得意宜思之耶意至故  
示

兄子發尚未有定日當送至瀾遠乖不可復言

適欲遣書會得足下示

十九日羲之報近書反至也得八日書知吳故羸  
敬倫動氣發耿耿想得冷此爲佳也敬文佳不一

法書要錄

卷之十  
三十五

汲古閣

一羲之報

省足下前後書未嘗不憂欲與事地相與有深情  
者何能不恨然古人云行其道忘其爲己其卿今  
日之謂政自當豁其胸懷然得公平正直耳未能  
忘已便自不得行然此皆在足下懷願卿爲復廣  
求於衆所悟故多山之高言次何能不

十一月七日羲之報近因

闕

子卿書想行至

三字

霜寒弟可不頃日了不得食至爲虛劣力及數字



義之報

二十三日義之報一日得書皆在計書所不得有反轉熱卿各佳否定何可得來遲面不一一義之報

知須果裁便可遣取視君勢陳欲欲無出理

近書至也得十八日書爲慰雨蒸比各一字可不

叅軍轉差也懸耿吾胛痛劇炙不得力至患之不  
得書自力數字

法書要錄

卷之十  
三十六

汲古閣

尊夫人向來復何如爲何所患甚懸情念卿累息  
具至義之欲問

想諸舍人小大皆佳弟摧之可爲心且得集目下  
此慰多矣姊累告安和梅妹大都可行袁妹極得  
石散力然故不善佳疾久尚憂之想野久恙至善  
分張諸懷可云不知其期何時可果永嘉競逐者  
有力恐難冀得大柿當種之

篤不喜見客篤不堪煩事此自死不可化而人理

所重如此都郡江東所聚自非復弱幹所堪足下  
未知之耳給領與卿同殊爲過差交人士因開門  
以勉待之無所復言

君遠在此乃受恩來今畱之明晚共親親集想君  
未便至餘姚爾

云殷生得快固大事數謝生書但有藥耳云彥仁  
或宣城甚佳情事實宜今有云想深復征許也

寂不得都問知卿云曰問故未知西審問使人憂

法書要錄

卷之十  
三十七

汲古閣

耿得問示

信使甚數而無還者似書疏不可得得問宜示告  
之知長翔田舍比卿還當知何候須得音副民望  
甚善

羲之白霧氣足下各何如長素轉佳甚耿耿

冀行面遣知問王羲之白

昨道諸書今示卿相見之恐殷侯必行義望雖宜  
爾然今此集信爲未易卿者便西者良不可言也



晴快足下各佳不長素轉佳也甚耿耿故知問具  
示王羲之白

足下晚可耳至劣劣力不一一王羲之白

十二月二十四日羲之報歲盡感歎得十二日書  
爲慰大寒比可不吾故羸乏力不一一王羲之報  
藥湯諸人佳也今知問朱博士何當還君可致意  
令速還想無稽畱

吾至今目欲不復見字

法書要錄

卷之十  
三十八

汲古閣

見君小大佳不過此乃知熙佳覺少不得同萬恨  
萬恨云出便當西念遠別何可云遲見玄度今或  
以在道

賓諸人佳不皆致心憶之不忘懷

妹不快憂勞餘平安

初月十二日羲之累書至得去月二十六日書爲  
慰比可不僕下連連不斷無所一欲噉輒不化消  
諸弊甚不知何以救之罔極然及不一一羲之白

昨近有書至此故不多也遲書不悉耳

知尚書中郎差爲慰不得吳興問懸心數吳中聞耳小奴在此忽患瘧比數發今日最爲大都輕瘧耳尚小停今在吾腕中念猶懸心小患耳無所坐心須佳乃去

此言不可乏得知足下問吾忽忽力數字

直遣軍使者可各差十五人耶合三十人足周事足下知消息今故遣問使至具示之力書不一一

法書要錄

卷之十  
三十九

汲古閣

王羲之白

方回遂舉爲侍中都下書云殷生議論殊異處憂之道故息同歲寒盡對此書還

論亦不能佳體懷省無所乏然卿供給人士及使役吏人論者亦謂大任意在世中政自不得不小俯仰同異卿復爲意卿此懷亦當玄同不能勉人耳

見尚書一日遣信以具必宜有行者情事恐不可



委行使耶遲還具問亦以與尚書諮懷今復遣諮  
吳興也

官舍佳也節氣不適可憂彼云何昨得義書比佳  
甚慰甚慰得官奴晉寧書賓平安念懸心此粗佳  
一日書此一

民以頃情事不可不勤思自補節勤以食噉爲意  
乃勝前者而氣力所堪不如自喪初不哭不能不  
有時惻愴然便非所堪哀事損人故最深益知不  
法書要錄

卷之十  
四十一

汲古閣

可不豁之

知足下數祖伯諸人問助慰絕不得兄子問懸念  
可言此於南北旨使無理比欲歎久也亦同失人  
竝欲勿勿群從書皆佳道冲書平安汝當改葬不  
可云勞冲遇此事或復連雷

省告一一足下此舉由來吾所具卿所云皆是情  
言然權事慮之重則當廢情以從宜非書所悉見

卿一一

吾陟冬節便覺風動日日增甚至去月十日便至  
委篤事事如去春但爲輕微耳尋得小差固爾不  
能轉勝沈滯進退體氣肌肉便大損憂懷甚深今  
尚得坐起神意爲復可耳直疾不除晝夜無復聊  
賴不知當塗一字得甦有間還得闕其寫不如今

忽忽日前耳手亦惡欲不得書示令足下知問

七月十五日羲之白秋日感懷浚得五日告甚慰  
晚熱盛君比可不遲復後問僕平力及不一一

法書要錄

卷之十  
四十一

汲古閣

王羲之白

知君患隱何以及爾是爲疲之極也一知此事恐  
不可以不絕骨肉之愛無論人事也乃甚憂君若  
自量過歎患不以輕心者一事不爾當何理

鄙故勿勿飲日三斗小行四升至可憂慮如桓公  
書旨闕其不去恐不能平

此信過不得熙書想其書一一也小大佳不賓轉  
勝皆謝之賢妹大都勝前至不欲食篤羸悔令人



憂餘粗佳

阿刁近來到卞上下皆佳姜夫數白

得書知足下且欲顧何以不進耶向與謝生書說  
欲往知登停山停山非所辯故可共集謝生處登  
山可他日耶王羲之白

不得君家書疏多往來皆平安耳今年此夏節氣  
至惡當令人危幼小疾苦故爾憂勞不可言

七月二十一日羲之白昨十七日告爲慰極有秋

法書要錄

卷之十  
四十二

汲古閣

氣君比可耳力及不一一王羲之頓首

近復因還信書至也

得九日問亦云鄙平平想得涼轉勝以疾乃服法  
必解此意

來月必欲就到家而得其問云尚多溪毒當復小  
却耳僕故有至臨州意尚未定自更有果南行者  
還乃得至壽春耳  
得都九日問無他

得豫章書爲慰想以具問昨得都十七日書賊徑  
還蠡臺不攻譙是其反善之誠也想殷生得過此  
者猶令人憂期諸處分猶未定羊叅軍旦夕至也  
遲一一  
殷廢責事便行也令人歎悵無已

安石定目絕令人悵然一爾恐未卒有散理期諸  
處分猶未定憂縣益深念君馳情又遣從事發遣  
君無復坐理交疾患何以堪此何以堪此恐屬無

法書要錄

卷之十  
四十三

汲古閣

所復厝懷卽乖大小不可言且憂君以疾他曳不  
易

得司州書轉佳此慶慰可言云與君數數或採藥  
山崖可願樂遙想而已云必欲剋餘杭之遲期此  
不可言要須君旨問僕事中久宜暨東復令白便  
行還便行當至剡槎上二十日後還以示政當與  
君前期會耳遲此情兼二三

昨暮得無爽阿萬此月二日書甚近清和耳羌賊



故在許下自當了也桓公未有行日阿萬定闕吳興

未復弘道近書見與弘遠書恐卿不得久坐何如休稚玄佳不想數得足下旨令知問

矇風膠今年似晚來年其主不起首者想或可得借乎

得反又獲示知足下發動脅腫卿此疾苦甚似期一一想消一當轉佳爲何治也吾爲亦劣大都復

法書要錄

卷之十  
四十四

汲古閣

是平平隔耳許日前後有其効何喻冀涼日晚散耳尋復知問王羲之

羲之頓首賢女殯斂永畢情以傷惋不能已已兄足下愍悴深至何可爲心奈何不能無時之痛憂卿便深今何如患深達旣往吾志勿勿力知問臨書惻惻王羲之頓首

賢室何如何可爲心唯絕難於人理耳諸患猶爾憂勞深似闕江侯闕到行底足下遺臨憒次冷取書

得謝范六日書爲慰桓公威勳當求之古令人歎  
息比當集姚襄也

斷酒事終不見許然守之尚堅弟亦當息同此懷  
此郡斷酒一年所省百餘萬斛米乃過於租此救  
民命當可勝言近復重論相賞有理卿可復論  
知數致苦言於相時弊亦何可不耳頗得應對不  
吾書未被荅得桓護軍書云口米增運皆當停爲

善

法書要錄

卷之十  
四十五

汲古閣

問董祥吾亦問之冀必來兵時得之甚佳頃日憤  
憤不暇復此省示及乃復憶之耳

周公東征四國是遑誠心款著謂之累積頻頻書

想至陰寒想自勝常皇矣漢祖纂堯

此四字真  
後闕

羲之死罪荀葛各一國佐命宗臣觀其轍迹實奇  
士也然苟獲譏於憂卒意長恨恨謂其弘濟之心  
宜被大道諸葛經國達治無間然處事而無玷累  
獲全名於數代至於建鼎足之勢未能忘已所謂



命世大才以天下爲心者容得爾乎前試論意久  
欲呈多疾憤憤遂忘致今送願因暇日可垂試省  
大期賢達興廢之道不審謂粗得阡陌不

信所懷願告其中并爾郎子意同異復云何邈然

無諮敘之期每賜翰墨使如蹙展義之死罪

此一行帖真

行

足下行穰久人還竟應快不大都當任縣量宜其

令闕二字因便任耳立俟王羲之白

法書要錄

卷之十 四十六

汲古閣

足下各可不都五日書今送謝即至想源得免豺

狼耳王羲之

羲之死罪近因周叅筆白牒伏想必達此春以過

時速與淡兼哀傷摧切割心情奈何奈何須臾寒

食節不審尊體何如不承問以經月馳企尸疾根

治滯了無差候轉久憂淡叔闕遣信自力粗白不

宣備羲之死罪

墳墓在臨川行欲改就吳中終是所歸中軍往以

還田一項烏澤田二頃吳興想弟可還以與吾故  
示想弟居意故如往言忠終高也是以息同之

此三頃田樂吳舊耳云卿軍府甚多田也

已上八字注

宜須一用心吏可差次忠良

十九日義之頓首明二旬增感切奈何奈何得十  
二日書知佳爲慰僕左邊大劇且食少至虛乏力  
不一一王羲之頓首

十二日告李氏甥得六日書爲吾劣劣力不一一

法書要錄

卷之十  
四十七

汲古閣

羲之書

行書

羲之死罪復蒙殊遇求之本心公私愧歎無言以  
諭去月十一日發都違遠朝廷親舊乖離情懸兼  
至良不可言且轉遠非徒無諮覲之由音問轉復  
難通情慨淡矣故旨遣承問還願具告羲之死罪  
群從彫落將盡餘年幾何而禍痛至此舉目摧喪  
不能自諭且和方左右時務公私所賴一旦長逝  
相爲痛惜豈惟骨肉之情言及摧惋永往奈何袁



妹委篤示致問荒憤不得此熱不能不取給腹中  
便復惡無賴

羲之死罪累白想至雨快想比安和遲復承問下  
官劣劣日前可力白不具王羲之死罪

皆以具示復自耳羊叅軍尋至具一一子期諸人  
何似耿耿心制行終不可居處

餘皆平安也

此五字一行闕

及以令弟食後來想必如期果之小晚恐不展也

法書要錄

卷之十  
四十八

汲古閣

故復旨示羲之報

增運白米來者云必行此無所復云吾於時地甚  
疏卑致言城不易然太老子以在大臣之末要爲  
居時任豈可坐視危難今便極言於相并與殷謝  
書皆封示卿勿廣宣之諸人皆謂盡當今事宜直  
恐不能行耳足下亦不可息致若言耶人之至誠  
故當有所面不爾坐視死亡耳當何當何已  
下闕

吾復五六日至東縣還復至問

想官舍佳見護軍近書甚慰仁祖轉嘉然疾根不  
除尚令人憂復得問未復反書甚慰入月某至窟  
山看甘橘思君宜深想鐵已還旦夕展也故復旨  
示義之報

小大佳也不得尚書中書問耿耿得業書慰之

亦得業書爲慰今付還安方決去不言言卽卿書  
致

適阮兒書其氣散曩處便危篤憂之怛怛

法書要錄

卷之十九  
四十九

汲古閣

貴奴差不想不成大病傷寒可畏令人憂當盡消  
息地

蚶二斛厲二斛前示噉蚶得味今旨送此想噉之  
故以爲佳比來食日幾許得味不具示

所欲示之

行一

若治風教可弘今忠著於上義行於下雖古之逸  
士亦將眷然况下此者觀頃舉厝君子之道盡矣  
今得護軍還君屈以申時立平頃命朝有君子曉



然復謂有容足地常如前者雖患九天不可階九地無所逃何論於世路萬石僕雖不敏不能期之以道義豈苟且豈苟且若復以此進退直是利動之徒耳所不忍爲所不以爲

上方寬博多通資生有十倍之覺是所委息乃有南眷情足謂何以密示一勿宣此意爲與卿共思之省以付火

諸暨始寧屬事自可得如教丹陽意簡而理通屬法書要錄

卷之十  
五十一

汲古閣

所無復逮錄之煩爲佳想君不復須言謝丹陽亦云此語君諸暨始寧

古之辭世者或被髮佯狂或污身穢迹可謂艱矣今僕坐而獲免遂其宿心其爲幸慶豈非天賜違天不祥

四字注

頃東遊還修治桑果今盛敷榮率諸

子抱孫遊觀其間有一味之甘割而分之以娛目前雖植德無殊邈猶欲教養子孫以敦厚退讓戒以輕薄庶令舉策數馬彷彿萬石之風君謂此何

如遇重熙去當與安石東遊山海并行田盡地利  
頤養閒暇衣食之餘欲與親知時共歡讌雖不能  
興言高詠銜杯引滿語田里所行故以爲撫掌之  
資其爲得意可勝言耶常依陸賈班嗣楊王孫之  
處世甚欲希風數子老夫志願盡於此也君察此  
當有二言不真所謂賢者志於大不肖志其小無  
緣見君故悉心而言

五字注

以當一面

想大小皆佳知賓猶伏爾耿耿想得夏節佳也念  
法書要錄

卷之十一  
五十一

汲古閣

君勞心賢妹大都轉差然以故有時嘔食不巳是  
老年衰疾更亦非可倉卒大都轉差爲慰以大近  
不復服散當將陟釐也此藥爲益如君告

大都夏冬自可可春秋輒有患此亦人之常期等  
平安姜此羸少差先生至其歡慰且卿女一而已  
大婚定芳勢道也

先生頃可耳今日略至遲委坐知樂公可爲之慰  
桃膠易得可以少耶專一物不移乃不忠也克迎



不致意知陽意事迎願人之善

行政五十日不復得問懸情皆佳也

闕

何貽云得

穎陽書平安慰意不得吳諸人問懸遲之

古之御世者乃志小天下今封域區區一方任耳而恒憂不治爲時耻之但今卿重熙之徒必得申其道更自行有餘力相弘也

甲夜義之頓首向遂大醉乃不憶與足下別時至家乃解尋憶乖離其爲歎恨言何能喻聚散人理法書要錄

卷之十  
五十二

汲古閣

之常亦復何云唯願足下保愛爲上以俟後期故旨遣此信期取足下過江問臨紙情塞王羲之頓首

足下識先日之言信信具

此一帖  
似闕

前得君書卽有反想至也謂君前書是戲言耳亦或謂君當是舉不失親在安石耳省君今示頗知如何老僕之懷謂君體之方復致斯言愧誠心之不著若僕世懷不盡前者自當端坐觀時直方其

道或將爲世大明耶政有救其弊算之熟悉不因  
放恕之會得期於奉身而退良有已良有已此其  
得之心不待多言又餘年幾何而逝者相尋此最  
所懷之重者頃勞服食之資如有萬一方欲息盡  
頤養過此以往未知敢聞言止於今也

知諸賢往數見范生亦得其近書爲慰又得孔生  
書亦云不能數何爾耶江生可耳斷絕冀涼集也  
得司州十六日書諸疾患至憂之至深矣有斷未

法書要錄

卷之十  
五十三

汲古閣

想桓公數便亦知謝生大得情和至慰安以當至  
吳興遲見之也

知須米告求常如雲此便大乏勅以米五十斛與  
卿有無當其何以論借

今有教勅付米可送之

數上下問如常何可得集耶念馳情未異果爲結  
念致問

不得東陽問想卿婦遂平復耳聾佳不謝之幼小



頃可行華母子平安知足下故聖甦還歲內何理  
過歲必有理不思存足下復得一敘平生當可言  
得卿書尋省反復但有悲慨比者且當數致年知  
字 闕一

畢力果思遲言面不可復得此與范期後月五日  
遂乃剋耳還遣旨進

頃猶小差欲極遊目之娛而吏李守之可歎耳陽  
化果似小可何日得卿諸人

法書要錄

卷之十  
五十四

汲古閣

鄙疾進退憂之甚濩使自表求解職時以許乃當  
是公私大計然此舉不濩又不宜是之於始二三  
無所成可以示從女其劣欲知消息

足下所欲餘姚地輒勅驗所須輒告  
此雨過將爲受想彼不必同苗稼好也

比見敬祖小大可耳念孫阮諸人皆何似耿耿  
尚書中郎諸人皆佳比面雖近隔殊思卿度還旦

夕

吾頃胸中惡不欲食積日勿勿五六日來小差尚甚虛劣且風大動舉體急痛何耶賴力及足下家信不能悉王羲之

永和九年歲在癸丑暮春之初會于會稽山陰之蘭亭修禊事也羣賢畢至少長咸集此地有崇山峻嶺茂林修竹又清流急湍映帶左右引以爲流觴曲水列坐其次雖無絲竹管絃之盛一觴一詠亦足以暢敘幽情是日也天朗氣清惠風和暢仰法書要錄

卷之十  
五十五

汲古閣

觀宇宙之大俯察品類之盛所以遊目騁懷足以極視聽之娛信可樂也夫人之相與俯仰一世或取諸懷抱晤言一室之內或因寄所託放浪形體之外雖趨舍萬殊靜躁不同當其欣於所遇暨得於已快然自足不知老之將至及其所之旣倦情隨事遷感慨係之矣向之所欣俛仰之間以爲陳蹟猶不能不以之興懷况脩短隨化終期於盡古人云死生亦大矣豈不痛哉每覽昔人興感之由



若合一契未嘗不臨文嗟悼不能喻之於懷固知  
一死生爲虛誕齊彭殤爲妄作後之視今亦由今  
之視昔悲夫故列敘時人錄其所述雖世殊事異  
所以興懷其致一也後之覽者亦將有感於斯文  
纏利害未若任所遇逍遙良辰會其一三春啟群品  
五字寄暢在所因仰眺望天際俯瞰綠水濱寥朗  
無涯觀寓目理自陳大矣造化功萬殊莫不均群  
籟雖參差適我無非新其二猗歟二三子莫非齊所  
法書要錄

卷之十  
五十六

汲古閣

託造真探玄退涉世若過客前世非所期虛室是

我宅

自前字至  
宅字注

遠想千載外何必謝曩昔相與無

所與形骸自脫落

其三

鑑明去塵垢止則鄙鄙生體

之周未易三觴解天形方寸無停主務伐將自平

雖無絲與竹玄泉有清聲雖無嘯與歌詠言有餘

馨取樂在一朝寄之齊千齡

其四

合散固有常修短

定無始造新不蹙停一往不再起於今爲神奇信

宿同塵滓誰能無慷慨散之在推理言立同不折

河清非所俟

其五

十一月四日右將軍會稽內史瑯琊王羲之敢致  
書司空高平郗公足下上祖舒散騎常侍撫軍將  
軍會稽內史鎮軍儀同三司夫人右將軍劉闕女  
誕晏之允之允之建威將軍錢塘令會稽都尉義  
興太守南中郎將江州刺史衛將軍夫人散騎常  
侍荀文女誕希之仲之及尊叔廩平南將軍荊州  
刺史侍中驃騎將軍武陵康侯夫人雍州刺史濟

法書要錄

卷之十  
五十七

汲古閣

陰郁說女誕頤之胡之耆之美之內兄胡之侍中  
丹陽尹西中郎將司州刺史妻常侍譙國夏侯女  
誕茂之承之羲之妻太宰高平郗鑒女誕玄之凝  
之肅之徽之操之獻之肅之授中書郎驃騎諮議  
太子左率不就徽之黃門郎獻之字子敬少有清  
譽善隸書咄咄逼人仰與公宿舊通家光陰相接  
承公賢女淑質直亮確懿純美敢欲使子敬爲門  
閭之賓故具書祖宗職諱可否之言進退唯命羲



之再拜

此是邨家論婚書書迹似夫人

良溪路滯久矣况今季末無所多怪足荒何邨於此足下志嶠外有由來及然以勢觀之卿入貴於不令耳書政當爾王義之白

知以智之所無奈何不復稍憂此誠理也然闕之懷何能已已乎未能得面書何所悉但溪得近期甕還故因教初日月

吾湖孰縣須水田卿都可遣儻之墓不知處去年

法書要錄

卷之十  
五十八

汲古閣

儻之者似是僉進可問之卿不出停此

親往爲慰息後諸能數不想昨咁兄以日此粗佳二謝叔喪與公近便索然玄度來數日有疾患便復來阿萬小差大事問有重慮安佳行來遇大蕩然阮公政散耿懷祖可呼賀祭酒俱

足下欲同至上虞一宿還無所廢吾初至便與長史俱行無不可不

吾爲卿任此聲者但此懷自不復得闕之於時

小大皆佳也度有近問不得上虞甚佳足下當能相就不思面卿前云當來何能果也遲散無喻吾後月當出以省念示

下近欲麻紙適成今付三百寫書竟訪得不得其人示之

省書知定疑來汝君長臆所養雖小要爲喪玉劉夫人靈坐在堂政爾遠來於禮誠不可違所以狼狽遠迎汝情地信難忍交恐有性念慮得來想慰

法書要錄

卷之十  
五十九

汲古閣

釋實引是以下復思此耳若汝能割遣無益得過喪制遂來居此乃事宜也若自量不能違哀念須吳等旦夕相喻者當來汝當自若吳意盡此也若來大小祥當復出者殊更良昌若汝不出農當單出汝能遣農速行不諸宜皆當自詳計審日遲望而更未定殊更悵恨不可言

此乃爲汝求宅謂汝來居止理軍千何可久處而情事不得從意可歎可歎終果來居者故當爲汝



求也以書示農

初月二日羲之頓首忽然此年感遠兼傷情痛切  
心奈何奈何念君哀窮奄經新故仰慕崩絕豈可  
堪忍比各何似相憂不忘當淡消息以全勉爲大  
僕衰老殆是日不如日力知問王羲之頓首

息率府朝得書知問足下差但尚頓極之不一  
初月一日羲之報忽然改年感息兼傷不能自勝  
奈何奈何異更寒諸疾此復何似不得問多日懸

法書要錄

卷之十  
六十

汲古閣

心不可言吾猶小差甚尚劣力遣不知羲之報  
卿各何罪似先羸而處至痛憂涕澁重得之息寬  
遣吾並乏劣自力不報息

此上下可耳出外解小分張也須產往迎慶息之  
不可言知靜婢面猶爾甚懸心

袁妹當來悲慰不言下家當慰意令知之

期小女四歲暴疾不救哀敏痛心奈何奈何吾衰  
老情之所寄唯在此等失此女痛之纏心不能已

已可復如何臨紙情酸

知靜婢猶未佳懸心可小須雷爾

十月十五日羲之頓首月半哀傷切心奈何奈何  
不可居忍得十三日書知問此何似恒耿耿吾至  
勿勿小佳更致問王羲之頓首

謝范新婦得

闕

富春還諸道路安穩甚慰心比日

涼卽至平安也上下集聚欣慶也華等佳不自新  
婦母子去寂寞難言息子輩不可言

法書要錄

卷之十一  
六十一

汲古閣

羲之死罪伏想朝廷清和稚恭遂進鎮東西齊舉  
想剋定有期也羲之死罪死罪

羲之白乖違積年每惟乖苦痛切心肝惟同此情  
當可居處羲之脚不踐地十五年無由奉展比欲  
奉迎不審能再降不豫唯哽闕故先承問羲之再  
拜

再昔來熱如小有覺然晝故難堪知足下患之云  
故以圍碁是不爲患吾其爾無佳自得此熱顛顛



終日未果如何王羲之頓首

五月二十七日州民王羲之死罪死罪此夏復便

半闕惟違離衆情兼至時增傷悼頃水雨未知有

不審尊體如何得疾除也不承近問馳企民自服

椽屑下斷體氣便自差強此物益人斷下去陟釐

劫樊遠也以爲良方出何是真此之謂謹及因青

州白牒不備羲之死罪死罪

寒伏想安和小大悉佳奉展乃具

法書要錄

卷之十  
六十二

汲古閣

羲之死罪見子卿具一一荒民惠懷塗一最要也

甚以欣慰唯愿不倦爲善承畱此生當廣陵任佳

此生處事以驗海陵江闕間殊令人有懷也羲之

死罪死罪

想元道弘廣平安道充當得還不

羲之頓首涼君可不女差不耿耿想比能果力不

王羲之頓首頓首

阮信止於界上耳向書已具不復一一王羲之頓

首

昨得殷侯荅書今寫示君承無怒詔連息順從或有怨望其不宜盤桓或順從至嫌也想復濼息

驗同罪

行一

十二月十日羲之白近復追付期想先後

三字注

皆

至昨得二十七日告知君故乏劣腹痛甚懸情災雨比日復何似善消息遲後問復平平不一一王羲之白

法書要錄

卷之十三

汲古閣

知尋遣家信遲具問

向遣書想夜至得書知足下問當遠行諸懷何可言十一必早發想至足下如向期也

行當是防民流逸不以爲利耶此於郡爲由上守郡更尋詳若不由上命而斷中求絕者此爲以利卿絕之是也縱民所之恐有如向者流散之患可無善詳具聞

君欲船輒勅給所須告之



得君戲詠承念至此年乃未見

太保思一散知足下歸乃至孔建安家熱乃爾往  
還以十實非乏所堪若之不復

兩字

更剋近道唯

命是往矣

恐有薄書之煩益屬所事可立制縣不給下貧

二字

注而給饒有之家開令治國別許爲盛田不平者  
嚴制如此事省而虛實可知其或非所樂而絕付  
給者今爲不賦得里人遂安黃籍前年皆斯人非

法書要錄

卷之十  
六十四

汲古閣

復一條可歎今便獨坐令白郗侯求官邈等想必  
可得君亦當得見書若萬一不樂想可共思得州

二字

數十家見經營不爾無坐此理也別當以具

慰澹共思不待煩言

十二月二十二日羲之白節近感歎情澹得去月  
二十三日書知君故苦日耿耿善護之往不僕得  
大寒疾不堪甚力還不具王羲之白

十四日疏昨信未卽取遣適得孔彭祖書得其弟

都下七日書說雲子暴霍亂亡人理乃當可耳惋  
惋桓公周生之痛豈可爲心

褚映

農敬親同日至至數日耳道路平安爲慰妹且停

爲大慶

懷克

知弟不果行吾不佳面近也

玠

適書至也知足下明還行復尅面王羲之白

小大佳也賢兄如猶當小佳然下不斷尚憂之

僧權

近所示欲依上虞別上申一期尋案臺報不聽上

法書要錄

卷之十  
六十五

汲古閣

當戮力於事不可但役解散君縣乃是今勝縣而  
復以爲難耶

知足下以界內有此事便欲去縣豈有此理此縣  
弊久因足下始有次第耳必無此理便當息意今  
勅諸處事及縣者省馳書於臺中論必釋然故遣  
旨信示意

羲之頓首白雨無已不見猶小差力不一一王羲  
之頓首



省告攝功曹事一一屬以所求寬逋廢守命必欲  
肅之是以間意其志既立不得不必行普通三年三月徐僧

權一十五紙天寶十載三月二十八日安定胡英裝朝議郎檢校尚書金部員外郎徐浩

與殷侯物示當爾不可不卿定之勿疑下字注

李母猶小小不和馳情伏想行平康邨新婦大都

小差卿大小佳四字別行縫有僧權字

近書至也得十八日書為慰雨蒸各可不叅軍轉

差也懸耿吾胛痛劇炙不得力至患之不得書自

法書要錄卷之十 六十六汲古閣

力數字縫上僧權字不全開元十五年跋尾其折處非本卷翰印楷處

足下當為遠慮不可計日前僧權

省示知足下奉法轉到勝理極此此故蕩滌塵垢

研遣滯慮可謂盡矣無以復加四字注漆園比之殊

誕謾如下言也吾所奉設教意政同但為形迹小

異耳方欲盡心此事所以重增辭世之篤今雖形

係於俗誠心終日常在於此足下試觀其終懷充褚映

適都十五日問清和傳賦問定寂寂當是虛也然

始興郡奴屯結不肯出恐成令人邑邑想官吏長

制之耳

褚映

兩寒卿各佳

一字注

不諸患無賴力無不一一義之

問

君清

庾雖篤疾謂必得治力豈圖凶問奄至痛惋情淡  
半年之中禍毒至此尋念相摧不能已已况弟情  
何可任遮等荼毒備盡當何可忍視言之酸心奈  
何奈何可懷君懷

法書要錄

卷之十  
六十七

汲古閣

此公立德由來而嬰斯疾每以惋慨常冀積善之  
慶當獲潛佑契同管人尋億闕事緬然永絕哀惋  
澁至未能驗心省足下書固不可言已矣可復奈  
何絕筆流涕

足下各可耳復雨可厭若吾所噉日去不復辭此  
意想足下明必顧之遲散義之頓首

范公及阮公既并微旨足下謂合損益之耳不謝  
義之死罪累白至也辱十四日告慰情念轉塞想



善平和下官至匆匆自力白羲之死罪諸人何似  
耿耿

遣令使白恐不時至耳

奉黃柑二百不能佳想故得至耳船信不可得知  
前者至不

云停雲子代萬頃桓公至今令荀臨淮權領其府

懷祖都共事已行

前僧權

月十三日羲之頓首追傷切割心不能自勝奈何

法書要錄

卷之十  
六十八

汲古閣

奈何昨反想至向來快雨想君佳方得此雨爲佳  
渡爲欣喜信既乏劣又頭痛甚無關不一一王

羲之頓首

兄靈柩坐至永惟崩慕痛貫心脊痛當奈何計慈  
顏幽翳十三年而吾勿勿不知堪臨始終不發言  
哽絕當復奈何吾頃至劣比加下昨

羲之頓首想創轉差僕其爾未欲佳憂憤力知問

王羲之頓首

長史  
劉信

三月十三日羲之頓首近反亦至念足下哀悼之  
至不可勝更寒外足下何如吾劣劣力遣知問王  
羲之頓首

書雖備至聚宜有以宣事情今遣羊叅軍西諸懷

所具必欲一字今觀想可思今得時面克令得還

也僧權  
徐浩

羲之白一日殊不叙闊懷得書知足下咳劇甚耿

耿護之冀以散力不一一王羲之白

法書要錄

卷之十  
六十九

汲古閣

知德孝故平平想當轉得散力每耿耿不忘懷足

下小大佳不

忽然夏中感懷冷冷不適足下復何似耿耿吾故

不佳得遠近問不虞生何當來遲一集昨見無爽

十九日三字書二十六日西也云仁祖服石散一

齊不覺佳酷羸至可憂力知問王羲之書白

書成得十一日疏甚慰三舍動靜馳情先書已具

不得一一



知汝表出便去不得見汝此何可言想秋必還恐  
此書不復及汝不一

混後有四行字是  
韓晉公章艸批

九家真慰鸞開鶴瑞集客登秦壘書一紙

孔侍郎著作

關三  
字

朝當時侍從庾叅軍兄弟三人

輒承命叅軍弟至都孫道常約孔東遷駒承命長

曹言切勅侍從承命謝功曹長旭故夫謝鞫死罪

死罪奉命輒侍從

塗三  
字

孔孝廉前吏孔琨死罪命

違輒侍從王征東郎最言輒當侍從孫叅軍定伯

法書要錄

卷之十  
七十

汲古閣

承命

王逸少字

注

頓首謝七日登秦壘可俱行當早也

僧權  
關字

諸患者復何如懸心比疏已具不復一一

桓安西觀自代蜀五

書勿勿未得遣信又不知足下問吾既不快弱小

疾苦甚無賴損尚小停有定

定字  
注

去日更與足下

相聞還不具王羲之白

兒故未至不知何父知足下念

適書至也此人須當令溼想足下可爲停之故示

王羲之頓首

徐僧權  
徐浩

六月三日羲之白徂暑此歲已半載慨淡可得二  
十七日書知足下安頃耿耿愁增患耶善消息吾  
至勿勿常恐一夏不可過不一一王羲之白

賊以還不知遇官軍云何可深憂之欲依上虞初  
到別上今勅聽之縣事不同直不相連耳

法書要錄

卷之十一  
七十一

汲古閣

旦奉祠感息悲慟得書知問吾之劣力不一一王

羲之問

僧權

重熙去具今子曰與曹論謝嶧吾又不下蔡書一

一足下清談

四字  
注

想必有理耳長任比得解未吾

與

二字  
注

江生論書蒼如此足下息所向示之要至

懷也須卿示

王逸少頓首敬謝各可不欲小集想集後能果

想曹參軍疾者已往必能同來



得告慰爲妹下斷以爲至慶吾比日至未果殊有  
邑想王羲之頓首

見弘遠二書皆以遠也動散卽佳爲慰

足下晚各何似恒灼灼吾坦之欲不復堪事內然  
力不一一王羲之頓首

前邊僧權  
後邊珍

足下各復何似恒灼灼故問王羲之白

足下似有董仲舒開閉陰陽法可勅令料付不雨  
憂之深珍重

法書要錄

卷之十  
七十二

汲古閣

曹庾王六君別

六字別行  
僧權

羲之頓首君可不語差也耿耿力之間王羲之頓

首

上下無恙從妹佳也得敬和近問不人有至憂其

疾者令人深憂

隔久何日能來

六字  
別行

曹叅軍

三字別行珍哲弟僧權開元五年闕  
十五日倍戎副尉臣張善慶裝云云

累書想至君比各可不僕近下數日勿勿腫劇數  
爾進退憂之轉深亦不知當復何治下由食穀也

自食穀小有肌肉氣力不勝更生餘患去月盡來  
停穀噉麪復平平耳

知玄度在彼善悉也無由見之此何可言

今與王會稽丘山陰書借人想故當有所得又語

丘令臨葬

兩字注

必得耳

縫上僧權

知劉公差甚慰甚慰知前乃爾委頓追以坦然今  
轉平復也阮公近聞不萬轉差也

已上右軍書語都計四百六十五帖

法書要錄

卷之十七十三

汲古閣

大令書語

得諸慰意吾故冀惡尋視汝又告

未復東近動靜馳情昨卽遣行爲不至耶

如省

此二字一行僧權

二十三日獻之間得十九日書之間後何如吾故

劣力不一一王獻之間

向聞遊諸縣作今退念時事

闕

覽之後復慨然

上縫

起居卽臣褚  
遂良姜珍



五月十二日獻之白節過感懷深至念痛傷難勝  
得五日告知君轉勝甚慰甚慰雨過此復何如想  
消息日平復也謹僕近暴不佳如惡氣當時極惡  
賴卽退耳故虛劣勿勿還不多王獻之白

知祖希佳爲慰慰數不得書其云至水門增深款  
之

思想轉思省告知君亦同如今未知面期近遠此  
慨可言惟深保愛數音問尋故旨取君消息

法書要錄

卷之十  
七十四

汲古閣

適得元直二十三日疏送白鮓今送十裹似並猶  
堪噉獻之白

信明還東有還書願送來已今分明至著都上  
慰之吾故沈頓思見之故想時能問疾得來先報  
之不能得自致者旨取車王獻之荅

獻之白兄靜息應佳何以復小惡耶復想比消息  
理盡轉勝耳礱石深是可疑事兄意患散輒發癰  
熱積乃不易願復更思唯賴消息獻之內外

二字  
注

極生冷而心腹中恒無他此一事是差但疾源不  
得佳論事當隨宜息之也獻之白

又一行屈猶存須見出欲

獻之白奉承問近雪寒患面疼腫脚中更急痛兼  
少下甚馳情轉和佳不審尊體復何如得此諸患  
小差不復思何如幸能復散故鎮益久藥何以不  
更將之遲尋復旨若獻之弊於淡飢飲得春風氣  
悞亂言故欲熱復食酒爲腹可耳獻之白

縫上紹宗點處

各闕一字

法書要錄

卷之十七

汲古閣

獻之白承姊一常惡不審得春氣復何如冬馳情  
餘安和至寧此故耳獻之白

育等可不轉息見之知恩慕不中

鍾紹京僧權

忽動小行多晝夜十三四起所去多又風不差脚  
更腫轉欲書疏自不可已惟絕歎於人理耳二妹  
復平平昨來山下差靜岐當還

知汝決欲來下是至願然嫂當得供養冀郡固有  
理若宣城瑯琊不果南有空缺可作者此信還具



白當與在事論爲不可須畱者便可決作來下記也上方大枋想汝不過數枋足彼故當足合偶此耳人方當粗足不果耳可白

吾當託桓江州助汝此不辨得遣人船迎汝當具東改枋枋三四吾小可

三字注

當自力蕪湖迎汝故

可得五六十人小枋諸謝當有便是見今當語之大理盡此信還一一白脚痛不可堪而比作書欲不能成之

法書要錄

卷之十  
七十六

汲古閣

張彥遠河東人能文工字學隸書喜作八分其家既出累世縉紳之後且復好事故藏積圖書如鍾張衛索王羲獻而下每至成軸其大父稔已有書名初得鍾繇筆意壯歲遂做獻之算年人許有羲之風度蓋凡三變而後成此其遺風餘澤沾馥後人者特非一日彥遠既老其家乃富有典刑而落筆不愧作者觀其爲論以謂書非小道本以助人倫窮物理神化不能以藏其祕靈怪不能以遁其

形則知盤礴胸次者固已吞雲夢者八九矣其流  
於筆端自應過人矧夫歷代奇觀一一到眼而心  
傳手受處復有家學耶嘗作法書要錄一十卷具  
載古人論書論且以傳列之又以九等品第書學  
人物自漢至唐上下千百載間其大筆名流幾不  
逃彀中矣更撰歷代名画記爲十卷自序其右云  
得此一書則書画之事畢矣觀其編次之善果非  
虛論又嘗以八分錄前人詩什數章至其倣古出

法書要錄

卷之十  
七十七

汲古閣

奇亦非凡子可到

出画譜  
本傳



云得此二書則書畫之事畢矣觀其編次之善  
果非虛語又嘗以八分錄前人詩什數章至其  
做古出奇亦非凡子可到

郭若虛圖畫見聞志云彥遠字愛實

陶隱居好患字書可看顧作主書之史晚愛松隸  
又最典掌之人且曰得作才鬼形錄頑仙世有名人則  
巖山之扇愈可增鏤凌雲之臺字頓減子矣迄  
唐河東張氏三世藏法書名畫彥遠又結彙其祖父  
本傳

法書要錄

汲古閣

所遺成二書以記錄書畫之子也陶隱居後生不知  
又從何顧也索讀其法書彙錄十卷載漢魏以來名  
文字篇不下一注疏不着一評跋豈其鑒後未精於  
益謂皆賢者不朽之藝後人親妙絕之蹟自呂袁  
昂二瘦及竇泉諸人月旦在海雲毛晉皆淺

